



Visoki predstavnik Valentin Inzko primio članove Hrvatskog sabora

Visoki predstavnik Valentin Inzko danas je u Sarajevu primio delegaciju Odbora za vanjsku politiku Hrvatskog sabora predvođenu predsjednikom Odbora Mirom Kovačem.

Tema sastanka je bila trenutna politička situacija u Bosni i Hercegovini, kao i pitanja u vezi sa euroatlantskim integracijama. Visoki predstavnik je hrvatsku delegaciju informirao o jedinstvenom stavu međunarodne zajednice da domaće institucije trebaju poduzeti sve neophodne korake kako bi osigurale neometano provođenje izbora 2018. godine i provedbu izbornih rezultata. Pružio je punu podršku procesu koji predvode EU i SAD, a koji za cilj ima prevazilaženje razlika u provedbi presude u slučaju Ljubić, te ponovio da je OHR spreman da nastavi pružati stručnu pravnu podršku.

Inzko je također podvukao suštinski značaj dobrosusjedskih odnosa između BiH i Hrvatske: „U interesu je obje zemlje da održavaju dobre odnose. BiH i Hrvatska su upućene jedna na drugu. Podrška Hrvatske euroatlantskim aspiracijama Bosne i Hercegovine je značajan resurs. Iskustvo Hrvatske u tom procesu, ukoliko se pametno iskoristi, može olakšati tranziciju Bosni i Hercegovini.”